

17/03/1997

Teknologi juga boleh menghancurkan

Perantau

SAYA merujuk laporan berhubung 'sebuah syarikat rekod dapat izin waris P Ramlee' minggu lalu. Pada saya kemajuan teknologi yang akan melanda negara kita bukanlah alasan untuk membelakangkan pandangan ulama.

Kemajuan teknologi yang akan menghancurkan kita semua jika kemajuan yang ada pada hari ini tidak digunakan dengan betul.

Perkembangan pesat multimedia di negara ini amat penting sebagaimana dinyatakan oleh Perdana Menteri, Datuk Seri Dr Mahathir Mohamad. Namun hanya segelintir saja rakyat Malaysia yang faham dan arif mengenai hal itu.

Perkembangan teknologi negara kita sebenarnya adalah satu teknologi yang dibawa masuk. Sesungguhnya kita tidak mencipta teknologi itu tetapi kita mengambil dan menggunakan teknologi yang dibawa dari luar negara.

Janganlah kita terlampau ghairah menggunakan teknologi baru (kononnya seperti apa yang di utarakan oleh wakil syarikat rekod itu) sehingga kita sanggup membelakangkan pandangan dan teguran ulama.

Kami rakyat Malaysia yang tinggal di Scotland juga sungguh terkejut dengan masalah sosial remaja.

Setiap hari kami mengikuti perkembangan masalah sosial remaja yang dilaporkan dan setiap kali itulah kami sedih kerana kebanyakan yang terbabit adalah anak bangsa Melayu.

Pemimpin kita melaungkan soal teknologi yang akan melanda negara kita pada masa akan datang, akhbar pula menyiarkan masalah sosial remaja. Di manakah kesinambungan yang boleh kita dapati daripada dua cerita yang berbeza ini?

Siapa yang akan menjalankan Koridor Raya Multimedia (MSC) jika tidak remaja sekarang yang akan menjadi pemimpin masa akan datang? Dapatkah mereka menjadi pemimpin satu hari nanti jika masalah yang kita hadapi sekarang tidak diselesaikan. Cukuplah dengan masalah bohsia dan bohjan.

Apabila ulama kita menegur kesalahan itu, maka kita akan menjawab ini adalah kemajuan teknologi yang harus dibanggakan. Kita membelakangkan pandangan alim ulama dengan alasan kemajuan teknologi yang harus kita lakukan tetapi harus diingat kemajuan teknologi yang ada pada kita jika tidak digunakan dengan betul akan menghancurkan kita semua.

Hasilnya ramailah anak bangsa Melayu menjadi bohsia dan bohjan dan sekarang masalah sosial remaja dan esok masalah lain pula.